

Ngoenzgeiq Cazyawj Duhngaz Majhung

贵港市覃塘区蒙公镇高占小学二年级 Leiz Gojloz/雷可乐

2019 nienz 4 nyied 8 hauh singhgiz it ok ndit

Ngoenzneix, Leiz lauxsae yaeuj aen batvax ndeu daeuj cuengq youq gakciengz henz gyangdaiz, yaek hawj dou youq ndaw ban guh duhngaz, dou sim' angq ndaej diuq hwnjdaej!

Leiz lauxsae youq henz son, dou dawz duhhenj swiq seuq le, cuengq haeuj ndaw bat bae, youh gya di raemxsaw, doeklaeng aeu gaiq baengzsa hau goemq baihgwnz. Leiz lauxsae gangj, yienghneix dawz duhhenj cimq seiq haj diemj cung le vuenh baez raemx ndeu, baezlaeng ngoenz vuenh baez raemx ndeu, couh ndaej maj ok duhngaz lo. Dou maqmuengh dwk.

2019 nienz 4 nyied 10 hauh singhgiz sam fwj lai

Gyanghaet, gou gig caeux couh daeuj ndaw ban cazyawj duhhenj bienqvaq. Gou fatyienh moix naed duh cungj bienq "biz" haujlai, miz mbangj cungj dawz naeng ciengq vaih lo, miz mbangj lij did ok ngaz iq ne! Gou gig sim' angq dawz gienh saeh neix lwnh hawj gyroengqdoih dingq.

2019 nienz 4 nyied 11 hauh singhgiz seiq mbwn'gvengq

Caeuq ngoenzlwenz ityiengh, gou youh caeuxcaeux buet haeuj gyausiz bae yawj duhngaz lo. Yo, hwnz seizgan ndeu, gij ngaz iq gingqyienz maj ok diuzdiuz rieng iq lo, lumj baenz duz baenz duz duzrug iq nei. Naedduh luenzlulu, bizbwdbwd, gij byak mbangmbimbi gaenq bokliz naedduh lo, lumj duzbid boknaeng ityiengh, geijlai mizyinx ha!

2019 nienz 4 nyied 12 hauh singhgiz haj ndithaenq

Ngoenzneix, Leiz lauxsae dawz aen batvax daeuj hawj dou cazyawj, dou gvaengz baenz gvaengz ndeu, ceng dawz aen'gyaeuj iet ndaw bae yawj: Ho, "diuzrieng" iq naedduh gaenq maj baenz "diuzrieng" hung noengqndwtndwt lo! Bonjlaiz di duh ndeu, seizneix gaenq bienqbaenz bat duhngaz rim ndeu lo. Doengh gij duhngaz neix youh hau youh biz, gou caenx mwngz, mwngz caenx gou, limqduh couh lumj aen'gyaeuj iq ityiengh oengjcoengh coh baihgwnz. Leiz lauxsae aeu fwngz lumhlumh aen'gyaeuj dou, riu naeuz: "Geijlai lumj aen'gyaeuj iq sou ha!" Coenz vah ndeu daeuj ndaej daihgya riuahaha.....

(boux lauxsae son'gyauq Lij Sunghlinz)



Sam Duz Meuz Gaeb Nou

Duzndaem、duzhau、duzraiz dwg sam duz meuz iq dwggyaez, gyroengqde dwg baengzyoux ndei, ciengzseiz youq doxcaez guhcaemz.

Miz ngoenz ndeu, gyroengqde doxcaez bae henz dah epbya. Byaij ha byai ha, sawqmwh, duz nou ndeu daj baihnaj gyroengqde buet gvaqbae, ndonj haeuj aencong henz loh bae, diuzrieng lij loh youq baihrog binengneng, lumj cingq naeuz: "Sou miz bonjsaeh daeuj gaeb gou vei!"

Sam boux baengzyoux mwngz yawjyawj gou, gou yawjyawj mwngz, cungj siengj baenzlawz cijndaej gaebdawz duz nouyak neix ne?

Duz meuzraiz yawjyawj fagcax ndaw fwngz, ndawsim siengi: Gou aeu fagcax raemj diuzrieng duznou goenq bae, duznou itdingh in ndaej buet okdaej. Yienghneix de doiq song boux baengzyoux naeuz: "Sou byaij gvaq henz bae, yawj gou baenzlawz gaeb duznou." De laeglemx byaij gvaqbae, yaengx fagcax hwnj, yungh rengz raemj roengzbae..... Hojsik ceiz lo, duznou ndonj haeuj cong hae, diuzrieng mbouj raen lo.

Meuzhau ndwn youq henz gip lo, ndawsim siengi: Gou yungh faexset gyaep duznou okdaej, caiq moeb duznou dai bae. Yienghneix de naeuz: "Sou yawj gou." De dawz faexset iet haeuj ndaw cong hae, hoeng, duznou ndaw cong dawz faexset hab raek lo, hix mbouj gyaep ndaej duznou okdaej.

Meuzndaem fwt siengi ok aen banhfap ndeu, vaiqvet buet daengz henz dah, riu doengj raemx ndeu dauqma. "Nyiengh mbat he, hawj gou daeuj." Meuzndaem naeuz. Yienghneix meuzndaem dawz doengj raemx raix haeuj ndaw cong hae, dahraix, gyroengq nou dumzsubsub ndeu daj ndaw cong buet okdaej lo, "Duz ndeu, song duz, sam duz....." Sam boux baengzyoux doxcaez yat hwnjbae, gaeb dawz duznou cei hong de.

Meuzhau caeuq meuzraiz cungj yaengx mehfwnz coh meuzndaem.

(hajnienzgaep Goj Sinhleiz)

Saehyinx Seiziq

上林县大丰镇皇周小学四(2)班 Dungz Gizvanj /童琪婉

Seiziq, gou miz haujlai saehyinx, lumj doxcaez diuqcag, guhcaemz gietnae, it ngeih sam vunzmoegdaez.....Hoeng gou cei maij dwg vut sujbaq.

Geiq ndaej seizhaenx gou ngamq ndaej roek bi, gou caeuq geij boux baengzyoux itheij guhcaemz, dou gvaengz baenz aen gien ndeu, Siujiengz youq rog gien cienq dwk, dou cix ciengq gij go lwgnyez. Hainduj lo, dou daihgya fwngz gaem fwngz ciengqgo: "Vut sujbaq, vut-sujbaq" Siujiengz gaem sujbaq youq rog gien buet ha buet ha, de laeglemx dawz sujbaq vut youq baihlaeng Siujiyij, Siujiyij cungj mbouj roxnyinh, doeklaeng daihgya cungj riuahaha, Siujiyij roxnyinh saehcingz mbouj doiq, de ngeuxgyaeuj baez yawj: Boihseiz lo, mbaw

sujbaq vut youq baihlaeng de lo. De sikhaek gip aeu mbaw sujbaq, lumj diuznaq liz gung nei, buet coh Siujiengz, siengj mbouj daengz Siujiengz vaiqvet naengh roengz aen dieгнаengh Siujiyij bae lo, yienghneix Siujiyij saw lo. Bouxsaw yaek yienj aen cezmuз ndeu roxnaeuz gangj duenh vahriu ndeu, Siujiyij couh gangj duenh vahriu ndeu, daeuq ndaej dou cungj riu ndaej diuz heujnaj yaek doek bae. Youh hainduj guhcaemz baez daihngaih lo, Siujiyij youq rog gien buet, de dawz sujbaq vut youq baihlaeng gou, gou ngeuxgyaeuj gvaqdaej, vaxdawz mbaw sujbaq buet bae coh Siujiyij, gig vaiq couh gaemh ndaej dawz Siujiyij lo. Siujiyij youh saw lo, de hojlien dwk diuq duenh foux ndeu, de diuq ndaej genga gyaenggyad, yak-yawj raixcaix, dou riu ndaej raemxda cungj rih okdaej lo. Dou yienghneix mbouj rox guh gvaq geijlai baez, dingq gvaq haujlai baez vahriu, diuq gvaq haujlai baez foux Ngoenzhaenx, beij gvaq ngoenzseng gou lij angq ne .

Neix couhdwg gij saeh seiziq mizyinx gou. Seiziq saehyinx mwngz youh dwg gijmaz ne? Vaiq daeuj caeuq gou ganggangj vei.

(lauxsae son'gyauq Vangz Gveiyangh)

